

CARTA DENDE CAMAJUANÍ (CUBA)

Por : Alina Primo Fernández

A presidenta da Unión Galega de Camajuaní, “Manuel Fraga Iribarne”, en Villa Clara, Cuba, remítenos esta carta, como unha primeira colaboración coa nosa revista:

“A Unión Galega de Camajuaní inaugurouse o día 7 de maio do ano 1995. Recentemente celebramos o 5º aniversario; nela agrupamos a tódolos galegos do Municipio de Camajuaní e ós seus descendentes, ó igual que a tódolos que teñan descendencia española aínda que sexan doutros lugares de España. Actualmente contamos con 200 asociados.

Realizamos distintas actividades socio – culturais e recreativas, sempre rescatando as nosas raíces e difundindo a cultura galega. Somos unha Asociación como Vdes. sen fin de lucro e poñemos de igual xeito desinteresado o noso traballo.

Dende a nosa fundación realizamos unha actividade que gusta moito ós nosos asociados, a elección da “Miss Gallega” e conservamos un álbum de fotos dende a fundación. Enviaremos unha foto para que a publiquen se é posible.

Realizamos excursións ós distintos Centros Turísticos do noso País; facemos conferencias e coloquios; celebramos o 17 de Maio o Día das Letras Galegas, este ano dedicado á figura de Manuel Murguía, literato, historiador, periodista e presidente da Real Academia Galega.

Tamén se celebrou a “Noite de Galicia en Camajuaní” no cine teatro da localidade.

E outras moitas actividades que realizamos, sempre tratando de difundir a cultura galega e manter vivas as nosas raíces.

Trataremos de enviarlles algún artigo, lendas, etc. para colaborar coa súa fermosa revista, anhelos que nunca poidemos realizar na nosa Institución por mor de limitacións económicas. Felicítámoslles por tan fermoso labor. (A parte gastronómica gustounos moito porque nos permite coñecer-la gastronomía Galega).

Reciban un afectuoso saúdo en nome de tódolos integrantes da Unión Galega de Camajuaní “Manuel Fraga Iribarne” e en particular da súa Presidenta”.



Presidenta do Centro Galego de Camajuaní

Camajuaní a 27 de xuño de 2000

CARTA DENDE A “HABANA VIEJA”, CUBA

Por : Felipe Cid Domínguez

Estimados Amigos:

A minutos de recibir a súa atenta misiva e a interesante revista “AUNIOS”, quero transmitir a vostedes o pracer con que acollín a grata nova de que alá no “terruño” querido, ó igual que aquí na nosa América, especificamente en Cuba, haxa xentes que desexen seguir divulgando a continuidade histórica dos nosos ancestros que é a nosa e, algo importante, de xeito gratuíto, pouco visto na época que vivimos.

Amigos, para coñecernos mellor direilles que son o fundador e director do boletín “Cova Céltiga”, que por espacio dun ano e dous meses vén chegando sen custo algún ás 49 sociedades galegas de Cuba, algunhas con máis de século e medio de fructífera vida a favor dos nacidos na nosa marabillosa terra, Galicia.

É un boletín sinxelo ó contar soamente cunha cuartilla (tiro e retiro). Só o amor os meus paisanos alenta a seguir este noso eterno peregrinar pola súa maxestade o tempo, na procura da necesaria axuda que nos chega da Secretaría Xeral para as comunidades galegas que dirixe Amarelo de Castro ou de outra organización non governamental galega que desexe contribuír con nós, naturais e descendentes daqueles que un día compartiron o pan e os peixes cos que quedaron no noso probe anaco de terra, ó outro lado do Atlántico.

Quero facer expreso o meu formal desexo de colaborar coa súa revista. Aquí envío algúns boletíns “Cova Céltiga”. Se algún tema vale pois nada a publicalo; só debes enviarnos a revista e nada máis. Anexo tamén algunhas poesías da miña inspiración. Non serán boas pero están feitas con moito amor, polo que espero gusten. Ademais quero que coñezas que teño contos e artigos xornalísticos de temática galega e a súa emigración a esta “Margarita de los Mares” como chamara a nosa illa o insigne mariño galego Sebastián Ocampo en 1509.

Habana Vieja, 24 de xaneiro 2001